

1924

192

LETTRE DE
L'ARCHIDVC LEOPOL
ENVOYEE
A
MADAMOISELLE
POVR TRAICTER
LA PAIX.



A PARIS,
Chez I. DEDIN, rue Saint Jean de Beauuais.

M. DC. XLIX.

LETTRE
DE L'ARCHIDUC
LEOPOL,
ENVOYEE A
MADAMOISELLE
POVR TRAICTER LA PAIX.



RINCESSE INESTIMABLE,

L'on sçait assez que vos incomparables Vertus donnent de l'admiration à tout le Monde, & que les Nations les plus éloignées de la France ne parlent de vos Merites qu'avec étonnement. Les vnes vous appellent le Miracle de la Nature, & le Chef-d'œuvre parfaict de la Grace. Les autres moins éclairées

A ij

des lumieres de la Religion Chrestienne
vous nomment la Diuinité du Siecle, &
l'Abregé de toutes les beautez. En cela
ie m'estime seul mal-heureux de ce que ie
n'ose librement publier vos perfections;
& que ie crains, avec raison, ou d'offen-
ser vostre modestie, ou de decouvrir par
mes paroles les flammes de mon cœur, &
les sentimens de mon ame. Mon esprit a
long temps balancé, Si épousant la que-
relle d'un parti, qui n'est pas tout à fait
vostre, cette entreprise seroit approuuée
de Vous, & si mes armes ne seroient pas
assez mal-heureuses pour vous donner de
l'alarme, & vous causer quelque pœur.
Mais apres m'estre consulté moy-mesme,
i'ay iugé que mes desseins estoient trop
iustes pour vous estre desagrecables, &
qu'un Prince genereux a tousiours droict
de s'interesser pour un ieune Monarque
de qui les Ministres veulent ruiner l'Estat,
& abbatre l'Authorité. J'ay creu d'ailleurs,
que l'approche de mes Troupes seroit un
acheminement à la paix, & que le Cardi-
nal desisteroit de ses entreprises voyant
que les estrangers mesmes viennent pour
punir

punir ses insolences, & se venger de sa
 temerité. Neantmoins, GRANDE
 PRINCESSE, n'ayant pas dessein de rien
 faire qui vous puisse desplaire: Et comme
 vous auez vn empire absolu sur mon
 esprit ie conjure VOSTRE GRANDEVR
 me mander par le mesme Courier que ie
 vous enuoye ce qu'il faut que ie fasse &
 pour obliger le Roy, & pour ne Vous
 pas offenser. Faiçtes mieux, s'il vous
 plaist, PRINCESSE INCOMPARABLE,
 Vous pouuez d'une seule parole dissiper
 toutes nos armées; rien ne peut resister
 à vostre puissance, vous triomphez des
 coeurs & des volontez: Et la Royne,
 aussi bien que les autres, n'oseront ja-
 mais vous refuser la paix, lors que vostre
 GRANDEVR la demandera avec instan-
 ce. Vous ferez vne action plus genereuse
 & plus louable que si vous auiez gagné
 des batailles & vaincu des nations entie-
 res. Il s'est trouué des Roynes qui ont
 eu assez de courage & de valeur pour
 faire des Roys esclaves & les despouiller
 de leur Royaume: Vous ferez mille fois
 plus glorieuse en donnant la paix à la

France. Et si les Histoires Sainctes publient si hautement les louanges & les rares qualités de la Royne Ester par ce qu'elle se rendit en mesme temps victorieuse d'Assuerus & de ceux qui auoient iuré la perte de sa Nation ; combien pensez vous que les bons François vous donneront de benedictions & feront des vœux pour l'heureuse prosperité de vostre personne, si vne fois vous mettez la France en repos, & les peuples hors de la misere. Je vous iure en mon particulier que la paix est le seul but, comme le seul desir de tous les Generaux, & que chacun la souhaite avec la mesme passion, que l'ambitionne l'honneur d'estre à iamais.

Grande Princesse,

Vostre humble seruiteur,
L'Archiduc LEOPOL.

